

山川典第二百四十四卷

濟水部彙考二

考

按風俗通義濟水出常山房子贊皇山東入沮禹貢浮于汶達于濟廟在東郡臨邑縣 濟者齊

齊其度量也

按西征記濟水自大伾入河與河水鬪而東流

按述征記河內溫縣亦有濟入於黃河謂濟之源

按地道志濟自大伾入河與河水鬪大伾成臯古成臯兼包鞏縣之界溢出爲滎水東流過陽武及封丘縣又東過宛胸縣南至定陶縣南又東北流與河水會東至乘氏縣西分而爲二其一東北流入鉅野澤過壽張西與汶水合又北過穀城縣西又東北過廬縣北經齊郡東萊郡而入海也尙書稱導沇水東流爲濟河水所在也又東北會於汶又東北入於海是也

按魏書地形志河內郡沁水

註

二漢晉屬治沁城有濟水

按隋書地理志河內郡濟源註有濟水

按地理通釋十道山川考濟水職方兖州川也一名洧出絳州垣曲縣王屋山東南始發源曰洧水
既見而伏東出于孟州濟源縣二源東源周迴七百步西源周迴六百八十五步合流至溫縣是爲
濟水西南入于河山海經出共山南東丘酈道元謂當王莽之世川瀆枯竭但入河而已不復截流
而南通典禹貢濟水洸爲滎今不復入滎

按野記濟水伏流暗經東阿縣今東阿井水煎爲之膠名曰阿膠可以已疾實濟水液也

按金史地理志沃州高邑註有濟水 益都府博興註有濟水 濟南府禹城註有黃河濟水

淄州鄒平註有系河濟河 高苑註有濟河 東平府須城註有濟河 孟州濟源註有濟

水

按圖書編濟水攷洧水出山西澤州陽城縣王屋山既見而伏東出於懷慶府濟源縣二源東源周
圍七百步其深不測西源周圍六百八十五步其深一丈合流至溫縣是爲濟水又至本縣西南號
公臺入于河潛行絕河復出于河之南溢而爲滎河南開封府滎澤縣地也既見而伏歷鄭州中牟

祥符陳留杞縣睢州歸德至山東兗州府定陶縣出于陶丘北又東至山東兗州府曹州過荷澤又東北至本府東平州壽張縣安民亭合汶水又東北至青州府博興縣入海東北者由東而北也北東者由北而東也 王屋山有三處據蔡傳在山西平陽府垣曲縣今一見山西陽城縣一見河南濟源縣實一山也綿亙數縣然泇水正發源處則在濟源西八十里

按河南通志濟瀆源出懷慶府濟源縣城西天壇山之太乙池伏流至濟源縣城西北三里匯爲二池東南流入黃河

按濟源縣志縣城之西九十里有王屋山山之絕頂有煉丹池西崖下爲泇水乃神禹導濟之自泇水出王屋西崖下名爲太乙池 濟瀆池在今縣西北三里許水經注導泇水東注于此既伏

而見平地水有二源按西源出縣城西今呼龍潭其水東北流逕濟瀆廟南東源出縣城東北其水東流至濟瀆廟東源與西源合又東北合北水亂流東南分注爲二一枝津注于渙一東南流出于温以其獨清絕河朝海不爲衆水濁亂故列在四瀆歷代祀典欽崇云 月泉在縣北東流合濟

水

按孟縣志沈水在縣城東二十里自濟源縣來至溫縣歷號公臺西南入于河

按溫縣志沈河在縣西二十五里禹貢導沈水東流爲濟入于河蔡氏註云沈河者濟水也發源王屋山爲沈伏流東溢爲濟至溫西鄙復名沈經南會渙水又名濟歷號公臺東至成皐入于河今濟河故道盡陷與渙水分流至圪塢村卽入于河 濟河在縣城南上接渙沈水源出自濟源縣王屋山經孟縣東南至孟江口曲折而東二十五里至沈河鎮會沈水入溫縣界名爲濟歷號公臺東至平皐入于河今故道盡陷河中

按鞏縣志古濟水入于河其地在今鞏河之北漢孔安國云濟由溫東南至鞏縣北而南入河與河並流過成皐此說最是

按滎澤縣志黃河舊在縣治北十里今南侵逼近縣城數決數治

按濟水至滎澤縣與黃河合流故言黃河而濟在其中

按開封府志滎水發源于濟源王屋山巖從高注下旣見而伏東出濟源縣由溫入河伏流溢爲滎禹貢導沈水東流爲濟入于河溢爲滎滎澤之得名以此今無水成平地矣

按歸德府志濟瀆池在柘城縣西濟瀆廟前遇旱官民禱雨輒應

按山東通志濟水禹貢云導沅水東流爲濟入于河溢爲滎東出于陶丘北又東至于潁又東北會于汶又北東入于海周禮兗州浸其川河濟是已水經注及山海經云濟水出河東垣縣王屋山初名沅水東出溫縣西北始名濟水又東南流當鞏縣之北而南入河與河並流過成臯溢出爲滎水東流過陽武及封丘縣北又東過宛胸縣南至定陶縣南又東北流與潁水會東至乘氏縣西分而爲二其一東北入鉅野澤過壽張西與汶水合又北過穀城縣西又東北過盧縣北逕齊郡東萊郡而入海也唐李賢謂濟自鄆以東貫滑曹鄆齊青以入于海宋樂史謂東平濟南淄川北海界中有水流入海謂之清河今按濟水在漢時伏流不見惟汶水自泰安州出者由故道東北流入海自元人引汶水入洸爲運河明因之凡汶水入海處皆築堰壩以遏其流而入海之道遂多湮塞今所謂大清河者乃汶水出洸河者復從張秋分流而入會齊東南諸山泉溝澤水北經長清濟河至歷城會灤水經濟陽齊東武定青城濱州蒲臺利津諸州縣界入海實濟河之故道也所謂小清河者卽灤水發源濟南趵突諸泉流至城北大清河出而合之由華不注山下東流會巨合水又東經章丘會清河又會灤河三水合流經鄒平長山新城又會孝婦河又東經高苑入博興樂安界合于烏河

又北至馬車瀆入海或云古灤水自華不注山東北入爲大清河自僞齊劉豫導之東行始爲小清河云又按鄆道元謂濟水在王莽時涸竭鄭樵通志亦曰濟水多涸竭自今觀之濟水勁疾能穴地伏流隱見無常乃其本性非眞涸竭也濟水旣伏流地中則發地皆泉又不特歷下諸邑爲然是故一見爲濟源再見爲滎水又見爲山東諸泉水而溢爲大小清河其實皆濟水也又何嘗見其涸竭耶淮南子曰濟水通和宜麥周官曰鸛鵒不踰濟風俗通曰濟齊也齊其度量劉向說苑稱濟能蕩滌垢濁通百川於海蕩出雲雨則濟水之德又古今所並稱云

按兗州府志濟水過河分而爲二其一爲北濟由陽武縣故城北逕封丘酸聚至濟陽縣故城北是爲府境其一爲南濟由陽武縣故城南逕小黃東昏至濟陽縣故城北是爲府境禹貢云道沔水東流爲濟按沔卽古兗字州所由名也 北濟入于鉅澤今不詳其出矣南濟分而爲二一爲濟瀆則承鉅澤之洪水一爲潯水則承鉅澤之黃水是二濟之流皆由鉅澤分也今濟瀆之入海惟大清河存其故道潯水之入淮者湮滅無存而鉅澤之遺墟南北巨隄幾數百里則如故也然濟之正瀆則枯竭已久不可指尋矣

按曹州志州城東南三十里有荷山清水出此

清水一名清澤濟水會此入海今涸

按定陶縣志濟水禹貢云東出于陶丘北水經注云又東北逕定陶恭王陵南蔡沈云濟水迅疾勁下多伏流明正德六年知縣紀洪濬濠掘得一泉初見尙微須臾流漸洶湧衆懼以大石塞之乃止故跡在西北城角堡下

清水發源于清山卽禹貢之清澤也濟水會此入海今涸

陶丘在

縣城北十里俗名髮山禹貢導沔水東出于陶丘北卽此

按壽張縣志濟水由定陶經今縣南五十里壩上書所謂東出于陶丘北又東至于清又東北會于汶又北東入于海也後枯竭爲黃河支派

按滋陽縣志濟河在縣治西六十里杏林間下卽雪沂泗水支流所會之水也

按歷城縣志古濟卽今汶也濟水伏流不見汶水自泰安州出者由故道自靈陽界至汶上東阿長

清齊河界入歷城北經上灤橋北灤水分響河入焉又東北逕華不注山陰又東經下灤堰

灤水舊入濟處

堰南卽小清河

又北逕濟陽齊東武定青城濱州蒲臺利津入于海

鈞突泉在縣西平地湧泉高至數

尺蓋濟水伏流至此而發灤水之源也由東北注小清河入于海

小清河濟水之支流也

灤水源出鈞突泉水經曰濟水又東北灤水出焉

大清河卽濟水故道

按武定州志濟河距州城南八十里今名大清河其水自張秋分流北逕長清齊河至歷城而東經濟陽齊東入州境又東過青城北濱州南蒲臺北利津東入于海

按濟陽縣志大清河卽清濟河俗以其水清因名又以華山新開小清河因名大清河在縣南門外其源自河南懷慶府濟源縣歷東阿長清歷城至此東經齊東至蒲臺利津入于海

按齊東縣志大清河在縣治北一里卽濟水之故道也由堯之柳溝泉經長清齊河歷城濟陽等縣至鄒家渡入本縣境蜿蜒向東紆迴可百里許東北至歸仁鎮入青城縣境至蒲臺縣境歸于海

按東阿縣志大清河者故濟瀆也水經云濟水至乘氏分而爲二其東北流者過壽張縣西界安民亭南汶水自東北來注之二水合流又北過須胸縣西又東北過魚山東左會馬頰水馬頰者濟之支津也又北逕清亭東又北逕穀城縣西又北逕周首亭西又北逕臨邑縣東臨邑者王莽謂之穀城亭又北逕平陰縣西又東北逕盧縣北又東北灤水出焉灤水者濟南鈞突泉也謂之小清河濟

水伏流至是而出與大清河合而皆謂之濟蓋大清爲濟正瀆挾汶入海故漢以前不謂之汶而謂之濟杜佑曰濟水自王莽末渠涸不復截河過今東平濟南界中有水流入海謂之清河實清澤汶水合流因舊名稱濟非濟水也至漢以來汶所由道則自岡城西南流至汶上之北四汶口又西北流過東阿縣西又東北流五百里入于海至元二十年開濟州河渠過汶入洸至任城會源開而分會源開者今濟寧天井開也會源開之水分而北流者至須城之安民山入清濟故瀆由東阿之戴家廟西旺湖薛家橋入于大清河以通海運而其上流出東平界者但言其北流入海而不著所由當亦入濟故瀆無疑矣其後開會通河自安民山達于臨清而汶水始會于漳不由濟瀆入海故元初海運謂之引汶入濟濟者濟故道也其後開會通河謂之引汶絕濟絕濟者濟爲漕河所遏不得東也而大清河自漢以來不謂之濟而謂之汶矣及考今河流其源出東平東北蘆山之陽謂之蘆泉合東山諸泉西南流逕東平城北而坎河水從南來注之坎河者汶之下流也明初開元故會通河于坎河之南築戴村壩以遏汶水北流之道使南入于運然每秋水泛溢決戴村壩而西至東平城南又折而西北入于大清河歷邑境之西南流至魚山南龐家口小鹽河水從西來注之小鹽河

者運河所出汶支流也汶水由戴村壩南流逕汶上之北至南旺而分其分而北者由沙灣五空橋洩之而東與黑龍潭水合流至龐家口而入大清河也大清河又北逕魚山東又北逕舊城東狼溪水從南來注之又東北逕艾山滑口而入平陰境又東北由長清齊河過濟南之北至利津入海也春夏旱暵坎河水西來者少則蘆泉諸水獨行大清之渠以會沙灣諸流故今所謂大清河者第得汶之首尾而實以東平諸泉由濟故瀆入海蓋亦不得專謂之汶矣海上諸鬻鹽者至濊口放關由大清河而上泊于魚山又南則由河渠至于東平西則由小鹽河至于張秋故大清河謂之鹽河按長清縣志大清河卽濟水故道自靈陽界西南流至汶上北四汶村東北經長清齊河等處入海按博興縣志博邑在古爲濟淄汶入海之地濟之徙而博今爲大清河趙宋之前章丘以上之水俱入大清河俱自鄒平而東入博興合時澗而濟水故道常中塞矣僞齊劉豫導趵突泉爲今之小清河以別于大清河實濟水故道

按蒲臺縣志大清河卽濟水故道也濟水伏流不見汶水自泰安出者由故道自靈陽縣界西南流至汶上東平折而西北流入東阿界又東北經長清齊河歷城濟陽齊東武定濱州蒲臺利津等州

縣入海

按利津縣志大清河在縣東門外半里許卽濟水故道濟水久伏流不見今止有汶水自泰安州出由故道經寧陽界西南至汶上縣北泗水村又至東平州南西北流入東阿縣界又東北經長清齊河歷城濟陽齊東武定青城濱州蒲臺利津等州縣入海明劉翊大清河記略云濟清之區有河曰大清濟水渠也自東阿之張秋東北抵利津豐國鹽場達于海

濟水部彙考三

陶唐氏

帝堯時舜居攝祭濟瀆

按書經虞書舜典望于山川

孔傳

九州名山大川五岳四瀆皆一時望祭之

疏釋水云江河淮濟爲四瀆

周

周制祭濟瀆禮視諸侯

按禮記王制天子祭天下名山大川四瀆視諸侯

秦

始皇并天下祭濟瀆 按史記秦始皇本紀不載 按封禪書秦并天下令祠官所常奉名山大川鬼神可得而序也自殺以東大川祠二曰濟曰淮春以脯酒爲歲祠因泮凍秋涸凍冬賽禱祠其牲用牛犢各一牢具珪幣各異 註 索隱曰濟廟在臨邑

漢

宣帝神爵元年詔祭濟瀆于臨邑界中命使者持節特祠 按漢書宣帝本紀不載 按郊祀志神爵元年制詔太常夫江海百川之大者也今闕焉無祠其令祠官以禮爲歲事以四時祠江海雒水祈爲天下豐年爲自是五嶽四瀆皆有常禮濟于臨邑界中使者持節侍祠一禱而三祠

北魏

明元帝泰常三年詔立濟瀆廟于桑乾水之陰 按魏書太宗本紀不載 按禮志泰常三年詔立五嶽四瀆廟于桑乾水之陰春秋遣有司祭有牲及幣四瀆唯以牲牢準古望秩云

太武帝太平眞君十一年南征祭濟水 按魏書世祖本紀不載 按禮志太平眞君十一年十一月世祖南征逕恆山祀以太牢浮河濟祀以少牢

唐

元宗開元十四年定祭濟瀆于河南 按唐書元宗本紀不載 按禮樂志五嶽四瀆歲一祭各以

五郊迎氣日祭之北海及祭于河南 按開元禮諸嶽鎮海瀆每年一祭各以五郊迎氣日祭之

祭北瀆大濟云唯神泉源清潔浸彼遐遠播通四氣作紀一方元冬肇節聿修典制

天寶六載詔封濟瀆爲公 按唐書元宗本紀不載 按舊唐書元宗本紀天寶六載正月詔曰五

嶽既已封王四瀆當陞公位濟瀆封清源公仍令所司擇日差使告祭

天寶十載遣河南少尹豆盧回祭濟瀆清源公 按唐書元宗本紀不載 按冊府元龜天寶十載

正月甲子有事于南郊大赦天下二月己亥遣河南少尹豆盧回祭濟瀆清源公取三月十七日庚

子與諸嶽瀆一時致祭

宋

太祖乾德六年定祭濟瀆于孟州 按宋史太祖本紀不載 按圖書編宋初尙緣舊制至乾德六

年有司言祠官所奉止四嶽今案祭典請祭北海濟瀆並於孟州

太宗淳化二年定濟瀆祭日及祭所 按宋史太宗本紀不載 按禮志淳化二年祕書監李至言
按五郊迎氣之日皆祭逐方岳鎮海瀆自兵亂後有不在封域者遂闕其祭國家克復四方間雖奉
詔特祭未著常祀望遵舊禮就迎氣日各祭于所隸之州長吏以次爲獻官其後立冬祀北海濟瀆
並於孟州北海就濟瀆廟望祭

仁宗康定元年詔封濟瀆爲王 按宋史仁宗本紀不載 按禮志康定元年詔封河瀆爲顯聖靈
源王

金

世宗大定四年命望祭濟瀆 按金史世宗本紀大定四年六月庚午初定祭五嶽四瀆禮 按禮
志四年禮官言嶽鎮海瀆當以五郊迎氣日祭之詔依典禮以四立土王日就本廟致祭其在他界
者遙祀立冬望祭北海北瀆大濟于孟州其封爵依唐宋之舊

章宗明昌 年封濟瀆爲清源王 按金史章宗本紀不載 按禮志明昌間從沂山道士楊道全
請封濟爲清源王每歲遣使奉御署祀版奩齋乘驛詣所在率郡邑長貳官行事

元

世祖中統二年定以濟瀆爲南道每道致祭遣使二人 按元史世祖本紀中統二年秋七月乙丑遣使持香幣祀嶽瀆 按祭祀志嶽鎮海瀆代祀自中統二年始凡十有九處分五道濟瀆爲南道遣使二人出璽書給驛以行

至元三年定以立冬日祭濟瀆 按元史世祖本紀至元三年秋七月甲午遣使祀五嶽四瀆 按祭祀志三年夏四月定歲祀嶽鎮海瀆之制十月立冬日遙祭北海於登州界濟瀆於濟源縣祀官以所在守土官爲之既有江南乃罷遙祭

至元十四年遣使代祀濟瀆 按元史世祖本紀至元十四年二月甲子遣使代祀嶽瀆五月命真人李德和代祀濟瀆

至元二十八年加封濟瀆爲王 按元史世祖本紀至元二十八年饑二月丁酉詔加嶽鎮海瀆封號各遣官詣祠祭告 按祭祀志二十八年加封濟瀆清源善濟王

明

太祖洪武三年正濟瀆稱號 按春明夢餘錄洪武三年夏六月始正嶽鎮海瀆稱號濟瀆稱北瀆

大濟之神

洪武七年定祭濟瀆于河南懷慶府 按明會典洪武七年定濟瀆于河南懷慶府祭又令春秋仲

月上旬擇日祭

代宗景泰二年祀濟瀆 按濟源縣志云云

孝宗弘治六年祀濟瀆 按濟源縣志云云

世宗嘉靖十八年南巡祭濟瀆 按明會典嘉靖十八年南巡經過處所望祭北嶽恆山之神用牛

犢羊豕上具常服行禮如常儀五府九卿巡撫大臣吉服陪拜至衛輝遣官祭濟瀆之神用太牢行

禮如北嶽俱翰林院撰祭文

穆宗隆慶三年遣官祭濟瀆 按續文獻通考隆慶三年八月以洪水爲患命總督河道都御史翁

大立祭大河大濟之神

濟水部彙考四